

LO JARDIN DE PAPET BANCEL

Lo jardin de papet Bancel
Es un jardin coma n'ia gaire
Ben segur dins tot lo terraire
N'en travaretz gès com'aquel.

Dns la comba de Mirabau
Raja una fònt prima et clareta
Que cascalha dins una gourgueta
Qu'ais aucels servis de mirau.

De bòna terra, d'aiga tot l'an
A la sosta dau mistralás,
Papet entre el diguèt tot plan
"Farai un òrt d'aquel ermás. »

Lo papet gròs travaillaire
En siès mes o aguèt netejat
Siague au bechard, siague à l'araire
L'ermás foguèt lèu esfatat.

Au printemps de l'an que venguèt
Semenèt de favas e de peses
De faviòlets e mai de cèses
E puòdi, de lònga, asaguèt.

La brava fònt dins sa gorgueta
Raava pron sens romegar
Contenta saique d'asagar
O belèu d'estre mens soleta.

Puòdi repiquèt de merinjanas
De pebrons, de pomas d'amour,
De raiòletas, de lesinhanas
E de plantar, plantar totjorn.

Au mes de mai quand faguèt bon
Semenèt una tièra de rabas,
D'apis, de bledas-rabas,
De cogordas e quauqui melons.

I ajustèt dòas regas de pòrris
De cebas rossas e d'aiets,
De caulets verds, de caulets flòris,
E quatre plants de fenolhet.

Oùblidèt pas leis ensaladas
Lachugas, machas vò rojetas
Escaròlas blancas e greissetas

Que recoltèt à banastadas.

Fasia la guerra ais erbas fòlas
Fauternassas e gramenas
Bortolaigas e correjòlas
E caucigas e jòuvertas.

Mamet Agata la polida
Un soer li venguèt coma aquò
« Mon amic jamai de la vida
I porras tene n'en fas de tròp.

Puòi ara d'aquelas fartalha
N'ai mon confle, sem pas de vacas!
Ais vesins e à la cosinalha,
Li portaras quauquei cabás”

Una figuèra, un perseguier
Dos ceriers, quauquei periers
Un amelier, un iranger,
Lo fartalher venguèt verger.

Papet Bancel un pauc poeta
Vouguèt tanben aver de flors
De ròsas lindas de tres colors
Qu'adusiá à la mameta.

Tulipas, iris e minhonetas
Péunas rojas e margaridetas
Violiers, lilas e violetas
Embaudemèron la combeta.

Quand junh d'amor beluguejava
Dins la telh d'òr comól d'abelhas
Lo rossinhòu, de nuòch, cantava
De l'òrt famós la meravelha.

Me podetz creire l'ai agut vist
Pur coma un éli, doç coma mel
Per ieu foguèt lo paradís
Lo jardin de papet Bancel.

Lo jardin de Papet Bancel
Era un jardin straordinari
De Marabau a Sant Nasari
Se n'en vaguèt gès com'aquel.